



Pa Prezidan Thomas S. Monson

Kanpe nan kote ki sen

Kominikasyon avèk Papa nou ki nan syèl la — ki enkli priyè nou fè L ak enspirasyon li ba nou yo — nesesè pou nou ka fè fas ak tanpèt ak eprev lavi yo.

Frè ak sè byeneme m yo, nou sot tande bèl mesaj maten an, e mwen konplimante chak moun ki te patisipe yo. Nou patikilyèman kontan pou n gen Èldè Robert D. Hales avèk nou ankò ki refè kounyeya. Nou renmen ou, Bob.

Pandan m t ap medite sou sa m ta renmen di nou maten an, mwen te santi m pouse pou pataje kèk panse ak santiman mwen konsidere ki aplikab ak apwopriye. Mwen priye pou m ka jwenn gidans nan remak mwen yo.

M ap viv sou tè sa a depi 84 an kounyeya. Pou m ba nou yon ti apèsi, mwen te fèt nan mem ane Charles Lindbergh te pran vòl nan premye vòl dirèk ki te soti Nouyòk pou ale Paris a nan yon ti avyon yon sèl plas ak yon sèl motè. Anpil bagay chanje depi 84 ane sa yo. Moun vwayaje al sou lalin e retounen. Anfèt, bagay ki sete sèlman syans fiksyon ayè yo vin tounen reyalyte jodia. Epi, reyalyte sa a, gras ak teknoloji epòk nou yo, chanje si vit ke nou pa ka menm suiv li — si n ap janm ka suiv li. Pou moun ki sonje telefòn kadran won pou vire lè w ap fè nimewo yo ak

machin atape amen yo, teknoloji jodia plis pase enpresyonan.

Epi, prensip moral yo nan sosyete a ap chanje ak yon vitès rapid tou. Konpòtman ke yon fwa yo te konsidere kòm inapwopriye ak imoral vin kounyeya non sèlman tolere men akseptab pou anpil moun tou.

Mwen fèk sot li nan *Wall Street Journal* la yon atik ekri pa Jonathan Sacks, rabi anchèf Grande Bretagne nan. Pami tout lòt bagay, li ekri: “Nan prèske tout sosyete Lwès yo nan ane 1960 yo, te gen yon revolasyon moral, yon abandon tout règ tradisyonèl ki te pou frennen konpòtman yo. Gwoup Beatles la te chante: “Tout sa nou bezwen se lanmou. Yo te abandone kòd moral Jideo Kreyen an. Nan plas li te vin gen [pwovèb]: *[Fè] tout sa ki bon pou ou a*. Yo te reekri Dis Kòmandman yo kòm Dis Sigjesyon Kreyatif.”

Rabi Sacs te kontinye plenyen:

“N ap gaspiye kapital moral nou an avèk menm neglijan nou gaspiye kapital finansye nou an. . . .

Gen anpil anpil zòn [nan mond lan] kote relijyon se yon bagay lepase e pa gen okenn vwa pou kontrekare kilti

ki ankouraje moun yo pou achte l, depanse l, mete l, egzibe li, paske ou merite li a. Mesaj la sèke moralite pasedmòd, konsyans se pou moun ki fèb, epi kòmandman ki pi enpòtan an se ‘Yo pa p kenbe ou.’”¹

Frè m ak sè m yo, bagay sa a — malerezman — dekri anpil nan mond ki antoure nou an. Èske se pou nou leve men nou anlè ak dezespwa pou nou mande kijan n ap janm rive siviv nan yon mond konsa? Non. Anfèt, nou gen levanjil Jezikri a nan lavi nou, epi nou konnen ke moralite pa pasedmòd, ke konsyans nou toujou la pou gide nou, epi nou responsab pou aksyon nou yo.

Menmsi mond lan ap chanje, lwa Bondye yo rete konstan. Yo pa chanje; yo pa p janm chanje. Dis Kòmandman yo se egzakteman sa yo ye a — kòmandman. Se *pa* sigjesyon yo ye. Yo osi nesesè nan tout sans jodia jan yo te ye lè Bondye te voye yo bay pitit Izrayèl yo. Si nou byen koute, n ap tande eko vwa Bondye, k ap pale avèk nou la a e kounyeya:

“Piga nou gen lòt bondye pase mwen sèlman.

“Piga nou fè okenn estati ni imaj taye. . . .

“Piga nou sèvi mal ak non Senyè Bondye nou an. . . .

“Toujou sonje jou Saba a pou nou sanktifye li. . . .

“Respekte manman nou ak papa nou. . . .

“Piga nou touye moun.

“Piga nou fè adiltè.

“Piga nou vòlè.

“Piga nou rann fo temwayaj. . . .

“Piga nou gen lanvi.”²

Kòd moral nou an definitiv; li pa negosyab. Nou jwenn ni non sèlman nan Dis Kòmandman yo men nan Diskou sou Mòn nan tou, ke Sovè a te ba nou lè L t ap mache sou tè a. Nou jwenn ni nan tout ansèyman L yo. Nou jwenn ni nan pawòl revelasyon dènne jou yo.

Papa nou ki nan syèl se menm nan yè, jodia, ak poutout tan. Pwofèt Mòmou di nou ke Bondye “enchanjab depi nan letènite jouk nan tout letènite”³ Nan mond sa a kote prèske tout bagay sanble ap chanje a, konsantans li se yon bagay nou ka repoze sou li, yon ankraj ke nou ka kenbe fèm an sekirite, pou dlo danjere pa pòte nou ale.

Sa gen dwa parèt pafwa ke moun yo nan mond lan ap amize yo plis pase nou menm. Kèk nan nou gen dwa santi nou limite pa kòd konduit ke nou menm nou genyen nan Legliz la. Men, frè m ak sè m yo, m ap deklare nou, pa gen *anyen* ki ka pote lajwa nan lavi nou oswa plis lapè nan nanm nou pase Lespri a ke nou ka genyen lè n ap suiv Sovè a ak respekte kòmandman l yo. Lespri sa a pa kapab prezan nan kalite aktivite anpil moun nan mond lan ap patisipe yo. Apot Pòl te deklare: “Lòm natirèl pa resevwa bagay Lespri Bondye yo; paske, pou li, se pawòl moun fou yo ye; ni li pa kapab konprann yo, paske se Lespri ki kapab fè l disène yo.”⁴ Tèm *lòm natirèl* la ka refere ak nenpòt nan nou si nou pèmèt tèt nou vin sa.

Nou dwe vijilan nan yon mond kote kilti yo grandman rejte bagay espiyèl yo. Li enpòtan pou nou rejte tout bagay ki pa konfòm avèk prensip nou yo, pou n refize abandone nan pwosesis la sa nou dezire pi plis la: lavi etènèl nan wayòm Bondye a. Tanpèt yo ap toujou vin frape pòt nou tanzantan, paske yo se yon pati nou pa ka anpeche nan eksperyans nou nan mòtalite a. Men, nou ap pi byen ekipe pou fè fas avèk yo, pou aprann de yo, epi simonte yo si nou gen levanjil la kòm fondasyon lavi nou ak lanmou Sovè a nan kè nou.

Pwofèt Ezayi te deklare: “Zèv lajistis se lapè; fwi lajistis se repo ak sekirite pou tout tan.”⁵

Kòm mwayen pou nou *nan* mond lan men pa *fè pati* mond lan, li nesèsè pou nou kominike avèk Papa nou ki nan syèl la atravè lapriyè. Li vle nou fè sa; l ap reponn priyè nou yo. Sovè a mande nou, jan sa ekri nan 3 Nefi 18 la, pou nou “veye, priye tout tan pou nou pa tonbe nan tantasyon; paske Satan vle pran nou.

“Se poutèt sa nou dwe toujou priye Papa a nan non m;

“Epi nenpòt bagay ki jis nou mande Papa a nan non m, si nou kwè n ap resevwa l, gade n ap resevwa l.”⁶

Mwen te akeri temwayaj mwen sou pouvwa lapriyè lè m te gen prèske douzan. Mwen t ap travay di pou m te fè yon ti lajan e m te debwouye m ekonomize senk dola. Sete pandan Gwo Depresyon an, kote senk dola sete yon bon ti kòb — espesyalman pou yon tigason douzan. Mwen te bay papa m tout monnen m te genyen yo, ki te total senk dola, epi li te ban m yon biyè senk dola. Mwen konnen te gen yon bagay espesifik mwen te planifye pou m te achte avèk senk dola a, malgre ke tout ane k pase yo, mwen pa ka raple m kisa l te ye. Mwen sèlman sonje enpòtans lajan sa a te genyen pou mwen.

Nan moman an nou pa t gen machin alave, konsa, manman m te konn voye m al pote rad nou ki te bezwen lave yo nan yon kote yo te konn lave rad chak semèn. Apre de twa jou, yo te voye yon pil sa nou te rele “rad mouye” retounen ba nou epi manman m te konn mete yo seche sou liy nan lakou deyè a.

Mwen te mete biyè senk dola m nan nan pòch pantalon mwen. Epi jan nou ka siman devine, yo te voye pantalon an al lave avèk kòb la nan pòch li. Lè m te reyalize sa k te rive a, mwen te santi m malad. Mwen te konnen ke yo te konn tcheke pòch yo anvan yo lave yo. Si yo pa t dekouvri kòb mwen an epi pran ni nan pwosesis sa a, mwen te konnen ke sa te prèske sèten ke lajan an t ap

tonbe soti nan pòch la nan lave epi youn nan moun k ap travay yo t ap pran li san l pa gen okenn ide sou moun pou l voye lajan an retounen bay, si jamè li te anvii remèt li. Chans pou m te wè senk dola m nan retounen an te piti anpil — yon bagay manman m te konfime pou mwen lè m te di l mwen te kite lajan an nan pòch mwen.

Mwen te vle lajan sa a; mwen te bezwen lajan sa a; mwen te travay di pou m te fè lajan sa a. Mwen te reyalize ke te gen sèlman yon bagay mwen te ka fè. Nan dezespwa, mwen te vire vè Papa m ki nan syèl la e mwen te priye li pou l kenbe kòb la ansekirite nan pòch pantalon an jiskaske rad mouye yo te retounen.

De long jou apre, lè m te konnen l te prèske lè pou machin ki t ap livre rad yo te pote lesiv nou an, mwen te chita bò fenèt la, ap tann. Pandan machin nan t ap vire vini nan koub la, kè m t ap bat fò. Osito ke rad mouye yo te antre nan kay la, mwen te gripe pantalon m nan e m te kouri al nan chanm mwen. Mwen te foure men m ki te tou ap tranble nan pòch la. Lè m pa t jwenn anyen imedyatman, mwen te panse tout bagay te pèdi. Epi, dwèt mwen te touche biyè senk dola mouye a. Pandan m t ap rale l soti nan pòch la, mwen te santi yon pwofon soulajman. Mwen te ofri yon priyè rekonesans sensè bay Papa m ki nan syèl la, paske m te konnen ke li te reponn priyè m nan.

Depi lè sa a mwen te gen priyè ke m pa ka konte ki te reponn. Pa gen yon jou k pase san m pa kominike avèk Papa m ki nan syèl la atravè lapriyè. Se yon relasyon mwen renmen anpil — e mwen t ap literalman pèdi san relasyon sa a. Si kounyea menm nou pa gen yon relasyon konsa avèk Papa nou ki nan syèl la, mwen sipliyè nou pou nou travay nan bi sa a. Si nou fè sa, n ap resevwa enspirasyon ak direksyon Li nan lavi nou — ki nesèsè pou nou chak la a si nou bezwen sivil espiyèlman pandan sejou nou sou tè a. Kalite enspirasyon ak gidans sa a se don Li

bay gratis si nou sèlman chèche yo. Ala trezò yo ye!

Mwen toujou santi m enb ak rekonnesan lè Papa m ki nan syèl la kominike avèk mwen atravè enspirasyon Li. Mwen aprann rekonèt li, kwè nan li, epi suiv li. Anpil fwa, mwen konn resevwa kalite enspirasyon sa yo. Yon eksperyans ekstraòdinè te pase an Out 1987 pandan konsekasyon Tanp Francfort la nan Almay. Prezidan Ezra Taft Benson te avèk nou pou preyme oubyen dezyèm jou konsekasyon an men li te retounen lakay li, epi konsa mwen te gen opòtinite pou dirije sesyon ki te rete yo.

Nan Samdi nou te gen yon sesyon pou manm Deutch yo ki te nan distri Tanp Francfort la. Mwen te abitye anpil avèk youn nan dirijan remakab nou te genyen nan Pays-Bas yo, Frè Peter Mourik. Jis anvan sesyon an, mwen te santi enspresyon klè ke m ta dwe rele Frè Mourik pou pale avèk manm Deutch li yo pandan sesyon an e ke, an fèt, li ta dwe premye oratè a. Mwen pa t wè li nan tanp la jou maten sa a, e m te pase yon nòt bay Èldè Carlos E. Asay, Prezidan zòn nou an, pou m te mande l si Peter Mourik te nan asanble a nan sesyon sa a. Jis anvan pou nou te kòmanse kanpe pou kòmanse sesyon an, mwen te resevwa yon nòt an retou nan men Èldè Asay ki te di m ke Frè Mourik *pa t* la nan asanble a, ke li te okipe yon lòt kote, e li te planifye pou vini nan sesyon konsekasyon tanp lan nan jou apre a avèk militè yo ki te nan pye a.

Pandan m te kanpe sou chè a pou swete moun yo byenveni ak pou prezante pwogram nan, mwen te resevwa enspirasyon klè ankò ke mwen te dwe anonse ke Peter Mourik se t ap premye oratè nou. Sa te alankont tout ensten mwen paske mwen te fèk sot tande Èldè Asay di ke Frè Mourik te definitivman *pa t* nan tanp lan. Sepandan, konfyan nan espirasyon an, mwen te anonse prezantasyon koral la, priyè a, epi mwen te anonse ke premye oratè

nou se t ap Frè Peter Mourik.

Pandan m t ap tounen al chita, mwen te voye je sou Èldè Asay e mwen te wè sou figi li ke l te panike. Nan apre li te di m ke lè m te anonse Frè Mourik t ap premye oratè a, li pa t ka kwè sa l te tande a. Li te di li te konnen m te resevwa nòt li a epi m te li li, e li pa t ka konprann poukisa mwen te kanmèm anonse Frè Mourik ta pral pale, konesan ke li pa t okenn kote nan tanp lan.

Pandan tan tout bagay sa yo t ap pase, Peter Mourik te nan yon reyinyon nan biwo zòn nan, nan Porthstrasse. Pandan reyinyon an t ap avanse, li te toudenkou vire gade Èldè Hawkes, ki te Reprèzantan Rejyonal lè sa a, epi l te mande l: “Konbyen tan ou ka pran pou mennen vit nan tanp lan?”

Èldè Hawkes, ki te koni kòm yon moun ki kondi vit nan ti machin espò li a, te reponn: “Mwen ka mennen ou nan 10 minit! Men poukisa ou bezwen ale nan tanp lan?”

Frè Mourik te admèt ke li pa t konn poukisa li te bezwen ale nan tanp lan men li te santi ke l ta dwe ale. Yo toude te derape imedyatman pou ale nan tanp lan.

Pandan koral mayifik la t ap chante a, mwen t ap gade tout kote, nan panse ke nan nenpòt ki moman mwen t ap wè Peter Mourik. Mwen pa t wè li. Men, sa k te remakab, mwen pa t panike. Mwen te gen yon bon asirans ke tout bagay t ap byen.

Frè Mourik te antre nan pòt devan tanp lan egzakteman nan moman priyè ouvèti a t ap fini, li pot ko janm konnen poukisa li te la. Pandan l t ap kouri antre nan koulwa a, li te wè mwen nan aparèy retransmisyon an e li te tande m anonse: “Kounyeya nou pral tande Frè Peter Mourik.”

Èldè Asay te grandman etone lè l te wè Peter Mourik imedyatman antre nan sal la epi vin chita sou chè a.

Apre sesyon an, Frè Mourik avèk mwen t ap pale sou sa k te pase anvan opòtinite sa a pou l te pale a. Mwen te medite sou enspirasyon ki te vini

jou sa a non sèlman a mwen menm men a Frè Peter Mourik tou. Eksperyans remakab sa a te vin tounen yon temwayaj inebranlab pou mwen sou enpòtans pou yon moun rete diy pou resevwa enspirasyon epi apres a kwè nan espirasyon an — epi suiv li — lè l vini. Mwen konnen san okenn dout ke Senyè a te bezwen pou moun ki te prezan yo nan sesyon sa a nan konsekasyon Tanp Francfort la te tande temwayaj vibran ak touchan sèvitè li, Frè Peter Mourik.

Frè ak sè byeneme m yo, kominikasyon avèk Papa nou ki nan Syèl la — enkli priyè n ap fè li ak enspirasyon l ap ba nou — nesesè pou nou ka kanpe devan tanpèt ak eprè lavi yo. Senyè a envite nou: “Pwoche kote m epi m ap pwoche kote nou; chèche m avèk dilijans epi n ap jwenn mwen.”⁷ Si nou fè sa, n ap santi Lespri Li nan lavi nou, k ap ba nou dezi ak kouraj pou nou kanpe fèm ak solid nan lajistis — pou nou “rete nan kote ki sen, epi pa kite moun deplase nou.”⁸

Pandan ke van chanjman mond lan yo ap soufle tout bò kote nou, epi prensip moral sosyete nou yo ap diminye devan je nou yo, se pou nou sonje pwomès presye Senyè a fè moun ki mete konfyans nan Li yo: “Nou pa bezwen pè. Mwen la avèk nou! Nou pa bezwen kite anyen ba nou kè sote. Se mwen menm ki Bondye nou. M ap ba nou fòs; m ap ede nou. M ap soutni nou ak fòs ponyèt mwen ki pa janm pèdi batay.”⁹

Ala yon pwomès! Se pou benediksyon sa yo vin pa nou, mwen priye nan non sakre Senyè ak Sovè nou an, Jezikri, amèn.

NÒT

1. Jonathan Sacks, “Reversing the Decay of London Undone,” *Wall Street Journal*, Out. 20, 2011, online. wsj. com; italik ajoute. *Nòt*: Lord Sacks se Rabi anchèf nan United Hebrew Congregations nan Commonwealth.
2. Egzòd 20:3–4, 7–8, 12–17.
3. Mowoni 8:18.
4. 1 Korentyen 2:14.
5. Ezayi 32:17.
6. 3 Nefi 18:18–20.
7. Doktryn ak Alyans 88:63.
8. Doktryn ak Alyans 87:8.
9. Izayi 41:10.

Ansèyman pou epòk pa nou an

Leson Prèttriz Mèlkisedèk ak Sosyete Sekou yo pou katriyèm Dimanch yo apral dedye ak “Ansèyman pou epòk pa nou an.” Chak leson kapab prepare apati youn oswa plis diskou ki te fèt nan dènye konferans jeneral yo (gade lis anba a). Prezidan pye oswa distri yo kapab chwazi ki diskou ki dwe itilize, oubyen yo ka bay evèk yo ak prezidan branch yo responsablite sa a. Dirijan yo dwe veye pou pou frè yo nan Prèttriz Mèlkisedèk la ak sè yo nan Sosyete Sekou a etidye menm diskou yo nan menm jou Dimanch yo.

Yo ankouraje moun ki asiste leson katriyèm Dimanch yo pou yo pote revè dènye konferans lan avèk yo nan klas la.

Sigjesyon pou prepare yon leson apati diskou yo

Priye pou Sentespri a kapab avèk ou lè w ap etidye ak anseye

nan diskou yo. Ou gen dwa ta renmen itilize lòt atik pou prepare leson an, men se diskou konferans yo ki pwogram apwouve a. Tach ou se pou ede lòt moun aprann ak viv levanjil la jan yo te anseye li nan dènye konferans jeneral Legliz la.

Repase diskou yo, chèche prensip ak doktrin k ap reponn ak bezwen manm klas ou yo. Epitou, chèche istwa, referans ekriti, ak deklarasyon nan diskou yo ki ap ede ou anseye verite sa yo.

Fè yon plan sou fason pou anseye prensip ak doktrin yo. Plan w lan dwe gen kesyon ki ap ede manm klas yo.

- Chèche prensip ak doktrin ki nan diskou yo.
- Panse sou siyifikasyon yo.
- Pataje sa ou konprann, ide, eksperyans, ak temwayaj.
- Aplike prensip ak doktrin sa yo nan lavi yo.

MWA POU ANSEYE LESON YO	PWOGRAM POU LESON KATRIYÈM DIMANCH
Novanm 2011 - Avril 2012	Diskou bibliye nan <i>Liahona</i> * Novanm 2011 la
Mai 2012 - Oktòb 2012	Diskou bibliye nan <i>Liahona</i> * Me 2012 la

*Diskou sa yo disponib nan plizyè lang nan *conference.lds.org*.



Pa Prezidan Dieter F. Uchtdorf
Dezyèm Konseye nan Premye Prezidans lan

Nou konte pou li

Senyè a itilize yon pèz trè diferan ak pa mond lan pou peze valè yon moun.

Moyiz, youn nan pi gwo pwofèt mond lan te janm konnen, te elve pa pitit fi Farawon an e li te pase premye karant ane lavi li nan kay wayal Lejip la. Li te pèsònèlman konnen laglwa ak grandè ansyen wayòm sa a.

Dèzane apre, sou tèt yon montay byen lwen, lwen anpil de esplandè ak grandè Lejip puisan an, Moyiz te kanpe nan prezans Bondye e li te pale avèk li fasafas menmjan yon moun pale avèk zanmi li.¹ Pandan vizit sa a, Bondye te montre Moyiz travay men li, sa ki te ba li yon apèsi de travay li ak laglwa li. Lè vizyon an te fini, Moyiz te tonbe atè pandan plizyè èdtan. Lè fòs li te finalman retounen, li te reyalize yon bagay ke, nan tout ane l yo nan lakou Farawon an, li pa t janm te reyalize.

Li te di: “M konnen lòm pa anyen.”²

Nou mwens pase nou sipoze

Plis nou aprann sou inivè a, se plis nou konprann—omwen nan yon ti pati—sa Moyiz te konnen an. Inivè a si gran, ak si gloriye ke li enkonpreyansib pou lespri imen an. Bondye te di Moyiz “M te kreye pakèt mond

moun pa ka konte.”³ Mèvèy syèl lannuit la se yon bèl temwayaj konsènan verite sa a.

Gen kèk bagay ki ranpli m avèk kalite admirasyon sa a tankou vole nan avyon nan nwasè lannuit ap travèse oseyan ak kontinan epi atravè fenèt avyon an gade glwa enfini dè milyon zetwal.

Astwonòm yo eseye konte kantite zetwal nan inivè a. Yon gwoup syantis estime ke kantite zetwal andedan chan teleskòp nou yo dis fwa pi plis pase tout grenn sab ki nan dezè ak bò lanmè nan tout mond lan.⁴

Konklizyon sa a gen yon similarite frapan avèk deklarasyon ansyen pwofèt Enòk la: “Epi si sete posib pou lòm ta konte yon ti kantite nan tè yo, wi, milyon tè tankou sa a, se pa t ap menm yon kòmansman nan kantite kreyasyon ou yo.”⁵

Etandone imansite kreyasyon Bondye yo, se pa etonan ke gran Wa Benjamin te konseye pèp li a pou yo “toujou kenbe nan memwa yo, grandè Bondye ak eta nil nou an.”⁶

Nou pi gran pase nou sipoze

Men, menmsi lòm pa anyen, sa ranpli m ak admirasyon ak

emèveyman ke “nanm yo gen yon gwo valè nan je Bondye.”⁷

E pandan ke nou petèt ap gade imansite inivè a e di, “Kisa lòm ye an konparezon avèk laglwa kreyasyon an?” Bondye li menm di nou se rezon k fè li kreye inivè a! Travay li ak laglwa li—bi inivè mayifik sa a—se pou sove ak egzalte limanite⁸ Otremandi, gwo etènite imans la, glwa ak mistè espas ak tan enfini yo tout te bati pou benefis moun mòtèl òdinè tankou ou menm avèk mwèn. Papa nou ki nan syèl la te kreye inivè a pou nou kapab atenn potansyèl nou antanke pitit gason ak pitit fi li.

Sa se yon mistè pou lòm: konpare avèk Bondye, lòm pa anyen; men nou se tout bagay pou Bondye. Pandan ke konpare avèk kreyasyon enfini an, nou gen dwa parèt ke nou pa anyen, nou gen yon etensèl dife etènèl k ap brile andedan nou menm. Nou gen pwomès egzaltasyon enkonpreyansib la—mond san fen—alapòte nou. Epi se gwo dezi Bondye pou ede nou atenn ni.

Foli lògèy

Gwo mètdàm nan konnen ke youn nan zouti ki pi efikas li pou detounen pitit Bondye yo se fè apèl ak bagay ekstrèm yo nan mistè lòm nan. Pou kèk moun, li pouse tandans ògeye yo, kote li fè yo gonfle e ankouraje yo pou yo kwè nan fantezi pwòp enpòtans yo ak karaktè envensib yo. Li di yo ke yo pa nenpòt ki moun òdinè epi poutèt abilte yo, dwa nesans yo, oswa ran sosyal yo, yo plis pase tout moun ki bò kote yo. Li fè yo panse ke poutèt sa, yo pa oblije suiv lwa okenn lòt moun e yo pa gen pou sousye de pwoblèm okenn lòt moun.

Yo di ke Abraham Lincoln te renmen yon powèm ki di:

*O poukisa lespri lòm mòtèl la dwe ògeye?
Tankou yon komèt ki pase rapid,
yon nyaj ki pase vit,
Limyè yon zeklè, yon vag lanmè,
Lòm pase soti nan lavi pou al nan
repo li nan tonm nan?*

Disip Jezikri yo konprann ke konpare ak letènite, egzistans nou nan mòtalite a se sèlman “pou yon ti tan” nan tèm tan e lespas.¹⁰ Yo konnen ke vrè valè yon moun pa gen pou wè ak sa mond lan panse ki gen pi gwo valè yo. Yo konnen menmsi yon moun ta anpile tout lajan ki gen nan tout mond la li pa t ap kapab achte yon ti moso pen nan ekonomi syèl la.

Moun ki pral “eritye wayòm Bondye” yo¹¹ se moun ki vin “tankou yon timoun, obeyisan, dou, enb, pasyan, ranpli avèk amou.”¹² “Paske yon moun ki vle leve tèt li, ya desann li; yon moun ki desann tèt li, ya leve li.”¹³ Disip sa yo konprann tou ke “lè n ap sèvi pwochen nou yo, se sèlman nan sèvis Bondye nou ye.”¹⁴

Yo pa bliye nou

Yon lòt fason Satan twonpe nou se atravè dekourajman. Li eseye fè nou konsantre sou lefèt ke nou ensiyifyan jiskaske nou kòmanse doute ke nou vo yon bagay. Li di nou ke nou twò piti pou moun remake nou, ke yo bliye nou—espesyalman Bondye.

Kite m pataje avèk nou yon eksperyans pèsonèl ki petèt ka ede moun ki santi yo ensiyifyan, pase mòd, oswa poukont yo.

Sa gen kèk ane, mwen te ale nan fòmasyon yo t ap fè pou pilòt nan Lame Etazini an. Mwen te lwen lakay mwen, yon jèn sòlda nan Lame Alman Lès la, ki fèt nan Tchekoslovakia, ki te grandi nan Lès Almay epi ki te pale Anglè avèk anpil difikilte. Mwen sonje klèmam vwayaj mwen pou ale nan baz fòmasyon an nan Texas. Mwen te nan yon avyon, chita bò kote yon pasaje ki te pale avèk

yon gwo aksan moun ki sot nan Sid. Mwen te ka konprann raman yon mo nan sa l t ap di. Mwen te menm ap mande tèt mwen èske sete bon lang nan yo te anseye m pandan tout tan sa yo. Mwen te terifye ak panse ke, pou m te pami premye pilòt yo nan fòmasyon pilòt la, m t ap gen pou fè konpetisyon avèk etidyan ki te pale Anglè natif natal.

Lè m te rive nan baz ayeryen an nan ti vil Big Spring, nan Texas la, mwen te gade e m te wè yon branch Sen Dènye Jou, ki te konpoze pa kèk mèveye grenn manm ki te konn reyini nan sal yo te lwe nan baz ayeryen an. Manm yo te nan pwosesis pou bati yon ti chapèl ki tapral sèvi kòm yon plas pèmanan pou Legliz la. Nan epòk sa yo, sete manm yo ki te konn plis travay nan bati nouvo batiman yo.

Chak jou mwen t ale nan fòmasyon pilòt la epi m te etidye otan m te kapab epi apres a m te pase pifò nan tan lib mwen te genyen ap travay nan nouvo chapèl la. La mwen te aprann ke yon ‘de pa kat’ se pa t yon pa dans men sete yon moso bwa. Mwen te aprann talan enpòtan tou sou fason pou m kontwole pous mwen lè m ap kloure yon klou.

Mwen te sitèlman pase tan ap travay nan bati chapèl la ke prezidan branch lan—ki te youn nan pwofesè nou yo—te di ke l te panse m ta dwe pase petèt plis tan ap etidye.

Zanmi m yo ak kanmarad klas pilot mwen yo te angaje tèt yo nan aktivite nan tan lib yo tou, malgre ke m panse m ka di ke kèk nan aktivite sa yo pa t ap konfòm avèk bwochi *Pou fòs jèn yo* nou genyen jodia. Bò kote pa m, mwen te kontan patisipe aktivman nan ti branch Lwès Texas sa a, ap pratike nouvo talan chapant m te fèk aprann yo, epi amelyore Anglè mwen pandan m t ap mayifye apèl mwen pou anseye nan kowòm ansyen an ak nan Lekòldidimanch.

Nan epòk sa a, Big Spring, malgre non li, sete yon kote tou piti, ensiyifyan epi ki pat koni. E mwen te konn souvan santi menm bagay la pou tèt

mwen—ke m te ensiyifyan, enkonni, e pratikman poukont mwen. Malgre sa, mwen pa t janm yon fwa mande tèt mwen si Senyè a te bliye m ni si l t ap janm kapab jwenn mwen kote sa a. M te konnen ke pou Papa m ki nan Syèl la, se pa t kote m te ye a ki te enpòtan, ni nan ki plas mwen te ye parapò ak lòt yo nan klas pilot mwen an, ni ki apèl mwen te genyen nan Legliz la. Sa ki te plis konte pou li sete ke m t ap fè pi byen m te kapab, ke kè mwen te panche vè li menm, epi mwen te dispoze pou ede moun ki bò kote mwen. Mwen te konnen ke si m te fè pi byen m te kapab, tout bagay t ap anfòm.

E tout bagay te anfòm.¹⁵

Dènye a va vin premye

Senyè a pa sousye de si nou pase jounen nou ap travay nan palè an mab oswa nan etab kote yo gade bèt. Li konnen kiyès nou ye, kèlkeswa enb sikonstans nou ye. L ap itilize—nan fason pa li ak pou objektif sakre li—moun ki tounen kè yo vè li.

Bondye konnen ke kèk nan pi gwo moun ki janm viv sou tè a se moun ki pap janm parèt nan paj listwa yo. Yo se moun enb, beni, ki imite egzanp Sovè a epi pase chak jou nan lavi yo ap fè byen.¹⁶

Yon koup konsa, paran yon zanmi mwen, montre egzanp prensip sa a pou mwen. Mari a t ap travay nan yon asyèri nan Uta. Nan lè manje li, li te toujou rale liv ekriti li oubyen yon revè Legliz la pou l li. Lè lòt travayè yo te wè sa, yo te konn ap pase l nan betiz ak defye kwayans li. Chak fwa yo te fè sa, li te pale avèk yo avèk jantiyès ak asirans. Li pa t janm kite mank respè yo fè l fache ni enève.

Dèzane apre, youn nan travayè ki te plis ap moke l yo te vin tonbe malad. Anvan l te mouri li te mande pou mesye enb sa a te pale nan antèman li—e li te fè sa.

Manm fidèl Legliz sa a pa t janm te gen anpil nan domèn ran sosyal ak richès, men li te pwofondeman enfliyanse tout moun ki te konnen li. Li te mouri nan yon aksidan pandan

I te rete pou ede yon lòt travayè ki te bloke nan nèt.

Nan lesplas ennan madanm ni te pase anba yon gwo operasyon nan sèvo, sa ki te fè l pa ka mache ankò. Men moun te renmen ale pase tan avèk li paske li koute. Li sonje. Li sousye. Li pa ka ekri, men li memorize nimewo telefòn pitit li ak pitit pitit li yo. Li toujou sonje fèt nesans ak anivèsè.

Moun ki vizite li toujou retounen lakay yo santi yo pi byen avèk tèt yo ak lavi a. Yo santi lanmou li. Yo konnen li sousye. Li pa janm plenyen men li pase jounen li ap beni lavi lòt moun. Youn nan zanmi l yo di ke fi sa a sete youn nan kèk grenn moun li janm konnen ki te vrèman montre egzanp lanmou ak lavi Jezikri.

Koup sa a se t ap premye moun ki t ap di ke yo pa t gen gwo enpòtans pou mond lan. Men Senyè a itilize yon balans trè diferan ak pa mond lan pou peze valè yon moun. Li konnen koup fidèl sa a; li renmen yo. Aksyon yo se yon temwayaj vivan sou lafwa solid yo nan li.

Ou konte pou li

Frè m ak sè m yo, se kapab vre ke lòm pa anyen an konparezon avèk grandè inivè a. Pafwa nou ka menm santi nou ensiyifyan, envizib, oubliye. Men toujou sonje—nou konte pou li! Si nou janm doute sa panse ak kat prensip divin sa yo:

Premyèman, Bondye renmen moun ki enb ak dou, paske yo “pi gran nan wayòm syèl la.”¹⁷

Dezyèmman, Senyè a delege “moun ki fèb yo ak moun ki senp yo pou pwoklame plenitud levanjil [Li] a jis nan bout tè a.”¹⁸ Li chwazi “bagay fèb yo nan mond lan [pou] avanse epi kraze sa ki fò yo”¹⁹ epi pou fè “bagay ki gran yo” wont.²⁰

Twazyèmman, kèlkeswa kote w ap viv, kèlkeswa enb sikonstans ou ye, kèlkeswa jan salè ou piti, kèlkeswa jan kapasite ou limite, kèlkeswa jan aparans ou senp, kèlkeswa jan apèl ou ka parèt piti nan Legliz la, ou pa envizib pou Papa nou ki nan syèl la. Li renmen ou. Li konnen kè enb ou ak aksyon lanmou ak jantiyès ou yo. Ansanm, yo fòme yon temwayaj dirab sou fidelite ou ak lafwa ou.

Katriyèmman epi finalman, tanpri, konprann ke sa w ap wè epi ap fè eksperyans kounyeya pa la pou dire pou tout tan. Ou pa pral santi solitud, lapenn, oswa dekourajman pou tout tan. Nou gen pwomès fidèl Bondye ke li pa p janm bliye ni vire do bay moun ki renmen li.²¹ Se pou nou gen espwa ak lafwa nan pwomès sa a. Aprann renmen Papa nou ki nan syèl la epi tounen disip li an pawòl ak aksyon.

Nou mèt asire ke si nou senpleman pèsevere, kwè nan li, e rete fidèl nan respekte kòmandman yo, yon jou, nou pral fè eksperyans pou tèt pa nou ak pwomès Apot Pòl te revele yo: “Bagay pèsonn pa t janm wè, ni pa t janm tande, bagay okenn moun pa t janm mete nan tèt yo, se sa Bondye pare pou moun ki renmen li.”²²

Frè m ak sè m yo, Èt ki pi puisan

nan inivè a se Papa lespri nou. Li konnen nou. Li renmen nou avèk yon lanmou pafè.

Bondye pa wè nou senpleman kòm kreyen vivan sou yon ti planèt k ap viv pou yon brèf sezon—Li wè nou antanke pitit li. Li wè nou kòm moun nou te prepare epi kapab devni an. Li vle nou konnen nou konte pou li.

Se pou nou toujou kwè, gen konfyans, mete lavi nou annòd pou nou kapab konprann vrè valè ak potansyèl etènèl nou. Se pou nou di pou benediksyon presye Papa nou ki nan syèl la sere pou nou yo. Se priyè mwen nan non Pitit Gason l la, Jezikri, amèn.

NÒT

1. Gade Moyiz 1:2.
2. Moyiz 1:10.
3. Moyiz 1:33.
4. Gade Andrew Craig, “Astronomers Count the Stars,” BBC News, 22 Jiyè 2003, <http://news.bbc.co.uk/2/hi/science/nature/3085885.stm>.
5. Moyiz 7:30.
6. Mozya 4:11.
7. Doktrin ak Alyans 18:10.
8. Gade Moyiz 1:38–39.
9. William Knox, “Mortality,” nan James Dalton Morrison, ed., *Masterpieces of Religious Verse* (1948), 397.
10. Doktrin ak Alyans 121:7.
11. 3 Nefi 11:38.
12. Mozya 3:19.
13. Lik 18:14; gade vèsè 9–13 tou.
14. Mozya 2:17.
15. Dieter F. Uchtdorf gradye premye nan klas li.
16. Gade Travay 10:38.
17. Matye 18:4; gade tou vèsè 1–3.
18. Doktrin ak Alyans 1:23.
19. Doktrin ak Alyans 1:19.
20. 1 Korentyen 1:27.
21. Gade Ebre 13:5.
22. 1 Korentyen 2:9.